

樂亭縣誌
(光緒)
二

ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三三八七九〇〇

定價：人民幣 九五〇〇元（全書共三百一冊）

樂亭縣志卷九

人物志上

宦望

鄉型

忠烈

文學

耆壽

邑自商周之際夷齊抗節爲百世師厥後召公德教被於全燕其間川嶽靈氣之所鬱蒸聖賢流風之所感發英才輩出皆卓然有以自立舊志列先哲一門未免收之太濫今斷自金始亦取其信而有徵云

宦望

昔聖門以四科造士中列政事一科政無大小各有當爲之事能事其事斯政舉矣邑之先達或功在朝廷或愛遺民社雖未盡登於

國史久已論定於鄉評著之於篇皆足以昭示來者若夫擴其謨猷恢其志量由此而進之臬夔稷契豈異人任是又在人之自勉耳

金

李元璋字寶臣馬城人少穎悟每千言一覽成誦未弱冠登正隆元年律科上第任西北路招討有能名陞左三品校法厯石城簿豐潤丞夏津令泰和間訪山東賢能舉官第一章宗特旨宣問璋奏正紀綱近忠直遠邪佞數事上嘉納之擢吏部尙書官至少中大夫上護軍府隴西郡開國侯食邑二千戶實封一百戶賜紫金魚袋

元璋事父母甚謹公餘拱立父側命退乃退溫清覲省
曲盡其禮鄉邦稱之兄元道詞賦進士仕至節度判官
舊志正隆間樂亭猶未置統屬馬城則馬城宜
志也後既析治而璋之子若孫分隸馬城故不載

齊陶其先宏正人高祖文及仕鄭州防禦使後徙石城再
徙馬城樂安鎮兄甫舉進士未仕卒陶於遼壽隆間監
樂安鎮酒務善幹辦金天會間授明威將軍階三級僕
馬萬餘而厭侈靡崇節儉孝友慈惠動以禮法律身鄉
閭翕然稱之長子執中修武校尉仲子允中忠顯校尉
俱恭謹世其行舊志云壽昌間徵授石
城令壽昌當是壽隆之譌

元

張昇字伯高其先定州人後徙平州昇幼警敏過人學語時輒能辨字音應對異於常見既長力學工文辭至元二十九年用薦者授將仕郎翰林國史院編修官預修世祖實錄陞應奉翰林文字尋陞修撰歷興文署令遷太常博士成宗崩大臣承中旨議奉徽號饗宗廟昇曰在典故凡有事於宗廟必書嗣皇帝名今將何書議遂寢武宗卽位議躬祀禮昇據經引古參酌時宜以對帝嘉納之至大初改太常寺爲太常禮儀院卽除昇爲判官久之外補知汝甯府民有告寄束書於其家者踰三年取閱有禁書一編且記里中大家姓名於上昇亟呼

吏焚其書曰妄言誣民且再更赦矣勿論同列懼皆引
起既而事聞廷議謂昇脫姦軌遣使窮問卒無跡可指
乃詰以擅焚書狀昇對曰事固類姦軌然昇備位郡守
爲民父母今斥誣訴免冤濫雖重得罪不避乃坐奪俸
二月旁郡移文報吳人侯君遠者言歲直王子六月朔
日蝕其占爲兵寇歲癸丑其應在吳分野同列欲召屬
縣爲備禦昇曰此訛言人當自息毋用惑民聽斥其無
稽衆論戇之部使者舉治行爲諸郡最厯江西行省左
右司郎中除紹興路總管大德至大間越大饑疫民死
者殆半賦稅鹽課責里胥代納吏並緣爲姦昇爲證於

簿籍白行省蠲之前守有爲江浙行省參知政事者爭
代者祿米有隙欲內之罪移平江歲輸海運糧布囊三
萬俾紹興製如數民患苦之不能堪更數守謂歲例如
此置弗問昇言麻非越土所生海漕實吳郡事於越無
與章上卒罷之昇既謹於繩吏又果於去民瘼故人心
悅服歷湖北道廉訪使江南行臺治書侍御史召爲參
議中書省事改樞密院判官尋復中書參議至治二年
又出爲河東道廉訪使未行拜治書侍御史明年出爲
淮西道廉訪使泰定二年拜陝西行省參知政事加中
奉大夫尋遷遼東道廉訪使屬永平大水民多捐瘠昇

請發海道糧十八萬石鈔五萬緡以賑饑民且蠲其歲賦朝廷從之民得全活者衆明年召拜侍御史天厯初出爲山東道廉訪使時方有警有司請完城以爲備昇曰民恃吾以生完城是棄民也由是民皆安之文宗賜尙醢文幣以賞其功踰年召爲太禧院副使兼奉贊神御殿事除河南省左丞復遷淮西道廉訪使昇時年六十有九上書乞致仕至順二年復起爲集賢侍講學士文宗眷待之意甚隆元統元年順帝卽位首詔在廷耆艾訪問治道昇條上時所宜先者十事尋兼經筵官廷試進士特命昇讀卷事已告省先墓帝賜金織文袍以

寵其歸明年以奎章閣大學士資善大夫知經筵事召
賜上尊趣就職昇以疾辭帝察其不可強許之尋命本
郡月給祿半以終其身至正元年卒年八十一贈資德
大夫河南等處行中書省左丞諡文憲

元史

王仲位世居樂亭父統剛毅有才力金末爲裨將從鎮國
上將軍完顏公領兵鎮高麗東方得甯統之功居多仲
位於元初從奇渥氏擊信安兒有功授左監軍取金汴
蔡擢先鋒西蜀事平賜璽書銀符中統初陞大都大同
真定等路奧魯都總管撫將士恩威兼至卒贈鎮國上
將軍長子珪另傳仲子瑣授本路鎮撫不仕

王珪仲位長子襲官從兵四川至元二十年加授武略將軍商州知州兼諸軍事持躬謙抑政事秩秩有條在任最久商人德之見陝西名宦志至元末陞宣命武節將軍成都路總管官治中兼奧魯等諸軍事子禕剛帶金符千夫長武略將軍

王伯川瑣子以祖廕授文階先充斷官知印後授懿州判官遼陽行省美其清慎屢委問事及給散賑濟錢糧一無所私陞大都路豐潤縣尹所至有政聲未幾卒於官妻石氏見列女傳

王祥字興國珪曾孫也父珍藥志作璽任興元路千夫長武略

將軍至元間從征江淮屯河口與南兵戰發九矢斃九
人下高郵絕糧道明年歿於王事祥以廕補侍御親軍
忠顯校尉數立奇功賜金牌晉武義將軍擢武畧將軍
乃牙叛討平之加武節將軍既而曰知足不辱知止不
殆乃累章求退時年六十有三蕭然野處訓誨子弟大
德七年卒年七十有九贈金吾上將軍征行兵馬都元
帥妻何氏封修武校尉中衛郡君

孟國寶下莊人中統初仕至太守弟國祥中統間仕興元
軍判官俱有能聲

齊泰縣南古城人至正間任登封主簿興學勸農平獄均

徭九年政成民爲立碑頌之

明

李樂大家坨社人洪武中貢入太學永樂間拜監察御史有激揚聲遷山東按察司副使卒後有行部者至詢樂得其子茂貧甚捐俸助之俾就塾則其品望可見矣茂正統間貢仕至高郵州知州茂子珏成化間貢任州判官

溫厚洪武中薦辟入仕歷職勤能官至都察院左僉都御史有直聲載明一統志

史怡永樂甲申貢入太學時遼軍亂入關怡守城有功授

戶部郎中歷任江西左參政載明一統志

李宗商在城社人霖仲子字尙質性沈靜寡言笑嗜學不倦登宏治庚戌進士授戶部主事歷員外郎中陞太僕寺少卿以忤當道謫兩淮運同致仕歸爲人有操守始終如一

張泰在城社人景泰間貢入太學授桐鄉縣知縣時桐鄉新置事多未備泰至經營三載六事修舉民不告勞俗多水火葬泰禁之購地置義冢他如闢險塞覈兼并招商賈政多可紀九年薦有成績陞開封通判見桐鄉縣志

盧敬其先山陽人徙定州元時又徙樂亭高祖在時
間聞於鄉敬領成化乙酉鄉薦授兵部司務侃侃不
冰操慄著五載考最進階後丁外艱卒家業蕭然嘗語
其子梁棐輩曰世之營利者爲子孫計耳然竟何益吾
厄一第子孫必有第者若曹勉之後孫耿麒果登進士
牛本景泰丙子舉人任九江府同知素性謙恭泣官廉慎
有惠政九年將代郡人赴部保留擢本府知府

盧耿麒字仁淑梁長子少聰穎過目成誦年十三補弟子
員弱冠登嘉靖癸未進士授工部虞衡司主事歷員外
郎陝西僉事屯田甘肅給戍牛種丁內艱起補江西僉

事雪數冤。陞山西參議比駐雲中當外叛甫平恩威
並著卽強藩亦斂戢防邊有運籌功建修五堡世廟賜
綸音有巨鎮賴以永安之語復丁外艱起補山東參議
陞山西副使以疾卒年四十有五麒麟玉立性直方篤
孝友父產悉讓二弟所居庭前無旋馬地博稽羣書詩
造唐語著藍山集涖官所至以明敏聞然議論博辯長
官前亦不少遜終以此取忌焉崇祀鄉賢

王好學臣長子領嘉靖庚子鄉薦嘗試南宮而父卒痛之
甚爲肖像朝夕奉之初令陳留繼擢刺澤州佐歸德蠲
逋修學所在多善政後轉太原請治宗室驕橫檄撫石